

## Tout in haut de ch'terril - 1/2

Interprété par Renaud.

Dins chés corons queu r'mue-ménache  
Chés mineurs vienn't' d'avoir leu congés  
Prenn't' leu valisses et partent voyager  
A la campagne ou vir leu parinté  
Mi comme el'z'autes j'prinds mes bagaches  
Ej' m'in vas mais j'quitte pont min pat'lin  
J'vos du pays v'là l'manière que j'm'y prinds  
Sans déboursier un sou d'train

Ej' passe mes vacances tout in haut de ch'terril  
J'a toudis d'la chance ch'terrain i'est jamais pris  
J'monte eum'toile ed'tente, j'vis tout seul, ej' m'arrinche  
Ej'siffle, ej'ris, ej'cante, ej'sus heureux d'faire du campinche  
Je m'fais la popotte, j'vis bien miux qu'à l'hôtel  
J'mets comme les cocottes du rouché à mes ortels  
Du haut dé m'couplette jé m'cros à Chambéry  
Mais Jé n'suis qu'au faîte tout in haut de ch'terril

Comme point d'vue faut vir ch'que j'degotte  
Les bos, les prairies des environs  
Chés villaches, chés villes, nou corons  
Et je m'rinche l'œul cha n'me coûte pas un rond  
Sus min fu d'bos j'fais tout m'gargotte  
Viandox, peumes terre frites, morcieau d'lard  
Et j'a monté trint'chinq lites ed'pinard  
Pour mi chucher in père peinard ...

Ej' passe mes vacances tout in haut de ch'terril  
J'a toudis d'la chance d'vir ch'que j'vos ch'est à mi  
Quand arrive eul'soir, ej'vos v'nir d'z'amoureux  
I z'attendent qu'i fêche noir, mais mi je n'les quitte pos des yeux  
I vont s'inlaçant, s'dijant des balivernes  
Tout in s'imbrassant dins chés blés, dins ch'luzerne  
I's font des papoules in s'app'lant "mon chéri"  
Et mi j'vos tout cha d'tout in haut de ch'terril

Mais avant hier j'n'a pont eu d'chance  
D'un seul cop vlà qu'i s'met à pluvoir  
J'rinte à l'abri d'zous min perchoir  
Em'tente all pichot, ch'tot pire qu'un arrousoir  
Alors j'a poussé la romance  
J'a sorti pour m'éviter l'cafard  
Et j'a fluté chinq six lites eud'pinard  
In berloquant comme un pochard ...

J'a dégringolé tout in bas de ch'terril  
Arrivé au pied jé m'sus rèl've tout meurtri

## Tout in haut de ch'terril - 2/2

J'sais pus quo qu'j'a fait, j'avos tell'mint eun'cuite  
A l'pache de m'barette j'avos sus m'tiête euch'codron à frites  
A forche ed'bourler m'panche sus des caillaux  
Y a eun'certain'plache i m'in manquot un morcieau  
J'y a mis un bout d'loque j'sus pos prêt d'ête gueri  
Et j'sus armonté tout in haut de ch'terril

Alors' pindant trente ans l'mineur-campeur il n'quitte pis sin cher terril,  
minme pinsionné il y va comme au passé. Seul'mint aujourd'hui i'est  
malate, el'fosse all'l'a usé. I'est dins sin lit et les larmes aux yux in ravisant  
à travers ech'carreau, i dit tout bas :

Comme cha va vite comme eul'temps passe  
Au terril j'a campé bin d'z'années  
A ch't'heure i faut l'abandonner  
Jé n'sus pus qu'un viux mineur pinsionné  
Et j'n'a pus qu'des oches dins m'carcasse  
J'sus vieilli mes gampes sont ramolies  
Et de l'fermiète in étant dins min lit  
In l'ravisant j'dis ch'est fini

J'mon'tra plus jamais tout in haut de ch'terril  
Fini désormais l'méd'cin j'l'ai ben compris  
Par quarante ans d'fond mes poumons i'ont quite cosse  
L'poussière eud'carbon in appelle cha la silicosse  
Ch'est bétot min tour ed'partir comme tant d'viux  
D'faire un long séjour là auprès du Bon Dieu  
J'espère qu'i m'laich'ra quand j's'rai au Paradis  
Cor' v'nir in vavances tout in haut d'min terril

J'espère qu'i m'laich'ra quand j's'rai au Paradis  
Cor' v'nir in vavances tout in haut d'min terril